

- मुख्यमंत्री भजनलाल शर्मा कह्यो-नौजवानां मांय कौशल विकास करण माथे सरकार रो खास ध्यान।
- राष्ट्रीय सड़क सुरक्षा माह रा तैत भांत-भांत रा कार्यक्रमों रे जरिये हिफाजत री अलख जगाई जा रही है-जयपुर मांय एक लाख मास्टर ट्रेनर बणावण री योजना।
- राज्य री मौजूदा विधानसभा रो तीजो सत्र 31 जनवरी ने राज्यपाल रा अभिभाषण सागे सरू व्हेला।
- राज्य स्तर रो युवा महोत्सव आज जयपुर मांय सरू व्ह्यो- 12 जनवरी तांई न्यारा-न्यारा कार्यक्रम राख्या जावेला।

000

मुख्यमंत्री भजनलाल शर्मा आज पेंडिंग पॉलिसीज एक्ट अर योजनावां रा बारा मांय आला अहलकारां सागे समीक्षा बैठक कीनी। मीटिंग मांय मुख्यमंत्री कह्यो के नौजवानां मांय कौशल रो विकास करण माथे सरकार रो खास ध्यान है। वे राज्य री कौशल नीति मांय नौजवानां ने खुद रे पाण ऊबा करण रा प्रावधान जोड़बा रा हुकम ई दीना।

000

18वों प्रवासी भारतीय दिवस सम्मेलन आज ओडिशा रा भुवनेश्वर मांय सरू व्ह्यो। विकसित भारत के लिए प्रवासी समुदाय का योगदान मुद्दा माथे व्हे रह्या ई सम्मेलन मांय 75 देशां रा करीब छह हजार प्रवासी भारतीय सिरकत कर रह्या है। प्रधानमंत्री नरेन्द्र मोदी रो काल ई सम्मेलन रो औपचारिक उद्घाटन करण रो कार्यक्रम है। मुख्यमंत्री भजनलाल शर्मा ई प्रवासी राजस्थानियां ऊं पाणी भेलो करण रा अभियान **कर्मभूमि से मातृभूमि** सारू मदद करण री अरज कीनी है।

000

देश मांय लारला साल व्ह्या सड़क हादसां मांय करीब 1 लाख 80 हजार जणां री मौत व्हे ग्यी। केंद्रीय सड़क परिवहन अर राजमार्ग मंत्री नितिन गडकरी खबरनवीसां सागे बातचीत करता थकां आ जाणकारी दीनी। वे बतायो के स्कूटर-मोटरसाइकिल चलाती गबत व्ह्या हादसां रे दौरान हेलमेट नी लगावण रे कारण करीब 30 हजार जणां री मौत व्हे ग्यी। मंत्री बतायो के मरण वालां मांय करीब 66 फीसदी लोग 18 ऊं 34 साल उम्र रा हा। श्री गडकरी कह्यो के स्कूलां अर कॉलेजां सामी उचित व्यवस्था नी व्हेवण रे कारण करीब दस हजार बच्चां री ई मौत व्हे ग्यी। वे कह्यो के सड़क हादसा मांय जख्मी लोगां रा ईलाज री कैशलेस उपचार योजना चलायी ज्यी है। ई रा तैत सरकार जख्मी लोगां ने डोढ़ लाख रुपया तांई री मदद देवेला।

000

राष्ट्रीय सड़क सुरक्षा माह रा तैत प्रदेशभर मांय वाहन रैली, समझाइश अर नुक्कड़ नाटक समेत भांत-भांत रा कार्यक्रम राख्या जा रह्या है। जयपुर मांय परिवहन विभाग री ओर ऊं जागरुकता अभियान चलायो जा रह्यो है। जयपुर रा प्रादेशिक परिवहन अधिकारी राजेंद्र सिंह शेखावत आकाशवाणी ने बतायो के पूरा महीना लोगां ने सड़क सुरक्षा अर यातायात नियमां री पालना करण रा बारा मांय जाणकारी दी जावेला। श्री शेखावत बतायो के जयपुर रा गांवाई अर शहरी हलकां मांय एक लाख जणां ने मास्टर ट्रेनर बणावणो तैय करी ज्यो है।

ई बीचे पाली मांय आज सूरजपोल चौराहा अर नहर पुलिया समेत न्यारी-न्यारी ठौड़ां लोगां ने सड़कां माथे हिफाजत ऊं जुड़्या नियमां, सीटबेल्ट, हेलमेट अर स्पीडलिमिट रा बारा मांय जाणकारी दीरीजी। म्हाणा खबरनवीस बतायो के ई सागे ई गाड़ियां माथे रात ने चमकण वाळा स्टीकर लगायी ज्यी।

000

देश मांय खाण-पीण री चीजां री जांच री 100 नुवी प्रयोगशालावां खोली जा रही है। केंद्रीय खाद्य प्रसंस्करण उद्योग मंत्री चिराग पासवान आज ग्रेटर नोएडा मांय **इंडस फूड 2025** रा उद्घाटन सत्र मांय आ जाणकारी दीनी। वे कह्यो के कृषि प्रधान देश व्हेवण रे कारण भारत, आवता बगत मांय मसालां रो वैश्विक बास्केट बण सके है।

000

राज्य री मौजूदा विधानसभा रो तीजो सत्र 31 जनवरी ने राज्यपाल हरिभाऊ बागडे रा अभिभाषण सागे सरू व्हेला। विधानसभा रा प्रमुख सचिव भारत भूषण शर्मा सत्र सरू व्हेवण री अधिसूचना आज जारी कर दीनी। विधानसभा अध्यक्ष वासुदेव देवनानी सत्र री तैयारियां री जाणकारी ले र अहलकारां ने

जरूरी हुकम दीना। राज्यपाल ने पूरा मान ऊं विधानसभा मांय लाया जावेला अर आरएसी बटालियन री ओर ऊं गार्ड ऑफ ऑनर दियो जावेला।

000

जयपुर रा सवाईमानसिंह स्टेडियम मांय आज राज्य स्तर रो युवा महोत्सव सुरू व्ह्यो। युवा मामलात अर खेल मंत्री कर्नल राज्यवर्द्धन राठौड़ इण रो उद्घाटन कीनो। पांच दिन रा ई महोत्सव मांय नाच-गाण समेत न्यारी-न्यारी होड़ां राखी जावेला। ई सागे ई नौजवानां सारू मोटिवेशनल सत्र ई राख्या जावेला। स्वामी विवेकानंद री जयंती युवा दिवस रे मौके 12 जनवरी ने ओ महोत्सव पूरो व्हेला।

000

जयपुर रा जवाहर कला केन्द्र मांय आज राष्ट्रीय युवा संगीत समारोह सुरू व्ह्यो। केन्द्रीय कानून मंत्री अर्जुनराम मेघवाल इण रो उद्घाटन कीनो। ई मौके वे कह्यो के तनाव कम करण मांय संगीत रो खास योगदान व्हे है।

तीन दिन रा ई जळसा मांय न्यारी-न्यारी होड़ां राखी जा रही है, ज्यां मांय पंद्रह राज्यां रा कलाकार शिरकत कर रह्या है।

000

बीकानेर रो नामी ऊंट महोत्सव दस जनवरी ने सुरू व्हेला। ई दौरान देशी-परदेशी सैलाणियां सारू कबड्डी, खो-खो अर रस्साकशी समेत भांत-भांत री होड़ां राखी जावेला अर सजा-धजा ऊंटों री परेड निकाली जावेला।

000

प्रदेश मांय एचएमपी वायरस रा पसारा री शंका ने ध्यान राखता थकां सगळा जिलां मांय सांस री गंभीर बीमारियां रा बारा मांय निगराणी राखी जा रही है अर जरूरी इंतजामात कर्या जा रह्या है। झुंझुनू रा मुख्य चिकित्सा अर स्वास्थ्य अधिकारी डॉ. राजवीर राव बतायो के जिला अस्पताल मांय खास व्यवस्थावां करी ज्यी है।

000

डीग जिला रा अकबरपुर पहाड़ी गांव मांय पुलिस साइबर ठगी करण वाळी गैंग रा 10 जणां ने पकड़्या है। आं रा कब्जा ऊं 15 मोबाइल फोन अर 12 फर्जी सिम जब्त करी ज्यी है, ज्यां मांय 10 लाख रुपया रा लेनदेन अर सेक्टरशन रा वीडियो मिल्या है। भरतपुर रेंज रा आई. जी. राहुल प्रकाश आ जाणकारी दीनी। वे बतायो के ऑपरेशन एंटीवायरस सागे ऑपरेशन शील्ड ई चलायी ज्यो है। राहुल प्रकाश कह्यो के मेवात हलका ऊं साइबर अपराध रा मामला खत्म कर्या जावेला। वे बतायो के ऑपरेशन एंटीवायरस रा तहत एक साल मांय मेवात हलका मांय साइबर अपराधां रा मामलां मांय घणी कमी आयी है।

000

100 दिन रा **क्षय रोग उन्मूलन अभियान** रा तैत कोटा मंडल रेल अस्पताल री ओर ऊं न्यारा-न्यारा कार्यक्रम राख्या जा रहा है। आज कोटा री रेलवे वर्कशाप कॉलोनी मांय जनता मांय जाग जगावण सारू रैली अर नुक्कड़ नाटक राखी ज्यो। अभियान रा तैत रेलवे टेशनां माथे पोस्टर, उद्घोषणा अर वीडियो प्रसारण रे मार्फत ई भी प्रचार-प्रसार कर्यो जा रह्यो है।

000

दौसा मांय होशियार विद्यार्थियां ने मुफ्त टेबलेट देवण री राज्य सरकार री योजना रा तैत आज अढ़ाई सौ विद्यार्थियां ने टेबलेट दिया ज्यो। वठे तीन दिन मांय 616 विद्यार्थियां ने टेबलेट दिया जावेला। ई मौके टेबलेट हासिल करण वाळा विद्यार्थी कह्यो के इण ऊं वां री भणार्ई-लिखाई आसान बणेला।

000

डूंगरपुर जिला रा आशान्वित ब्लॉक झोंथरी मांय आस वाळी लुगाइयां अर दूध पावण वाळी मायड़ां मांय खून री कमी दूर करण सारू चिकित्सा विभाग री ओर ऊं अभियान चलायो जा रह्यो है। मुख्य चिकित्सा अर स्वास्थ्य अधिकारी डॉ अलंकार गुप्ता बतायो के गांवां मांय शिविर लगा र महिलावां मांय हीमोग्लोबिन रा लेवल री जांच करी जा रही है। ई सागे ई बुजुर्गां, दिव्यांगजन अर नैत्रहीन लोगां री वां रे घर जा र हीमोग्लोबिन री जांच करी जा रही है।

000

पाली जिला मांय सिंदरू रा प्राथमिक स्वास्थ्य केंद्र मांय आयुष्मान शिविर लगायी ज्यो। इण मांय राज्य सरकार री स्वास्थ्य सेवा योजना रा तहत 70 साल अर बत्ती उम्र रा लोगां ने 5 लाख रुपया रा स्वास्थ्य बीमा रा आयुष्मान कार्ड बणायी ज्यो। ब्लॉक रा मुख्य चिकित्सा अधिकारी डॉ गोविंद सिंह बतायो के शिविर मांय दांतां अर आंख्यां रा डॉक्टर अर वैद्यजी जाँचां कीनी अर जरूरी राय दीनी।

000